

गलातीरालाई

पावलए परींद ओरायो चिथी

आव चिथी गलातिया खन्दलाव यायुं हुबोराए जूनी पावलए ओसरो ज़। नोर यहूदीराकिन छुत जातलाव मिंर ज़। पावलए ड़ादा गलातियाल परमेस्वरए ओपाँ ओरासथैज़्याव बेलाक नलावराए कुधुए ज़ यायुं उहुपज़्याव (ओसाचीर १३:४-१४:२५)। खाली पावल ओबाव छीनी ख्वा ख्वा यहूदी धर्म मानिज़्यावराए नोरालाई, “जे परमेस्वरसकावर तान्या ताकिन मोसाए ओकानुन मिताव क्यालन्या सरेस ब जैव ज़ परिके,” है यारादोज़्याव (गलाती १:६-९; ६:१२-१५)। है जैद पावलए नोराए यापाँ उल्लैदद्याद, परमेस्वरस खैन्या ताकिन मोसाए ओकानुननी माःक, येसु ख्रीसलाई युं हुपन्यानी वाज़ ताज़्या लिद गलातियालाव यायुं हुबोरालाई सरैःद ओरायो रैःज़्या (२:१६)।

१ डा पावल परमेस्वरए ओसाची तान्या मिंराए ल्योनी डादैव माःक, मिंराए यापरींनाव ब माःक। आव येन ते गेप्रभु येसु ख्रीस स़ोनो ओललाई सिउनी सोचोइज़्याव गेबाबु परमेस्वरनी डादैव ची। २ डा स़ोनो डास लिज़्याव गेदाज्यु भाइरास, जे गलातियालाव मन्दलीरालाई आव चिथी परींद गयाचिज़्या।

३ परमेस्वर गेबाबु स़ोनो गेप्रभु येसु ख्रीसनी नियुं गरौंद जेयुं होलाँ जैद ओयाचिरक। ४ परमेस्वर गेबाबुए उयुंलाव मिताव येन दान्या लिद गेलाई आव पापी जुकनी पलेन्याए जूनी येसु ख्रीसए ओल उजिउ चरैःदद्याद गेपापए सज़ा ओल ज़ घुदर्चासिक्यो। ५ परमेस्वरलाई खर्क ज़ माखेन्त्या ज़गै मगै ओताक। आमेन।

जेथैव चाव थाकिन छुत था माले

६डा जेलाई रँद बक्क डाताऱ्या।
जे काता घरी ख्रीसए ओदयाल
खुल्ज्याव परमेस्वरलाई रास्द छुत
थारादा जेबाऱ्याव? ७खास दाद छुत
चाव था काता ज़ माले। खाली रूवा
रूवाराए ख्रीसए ओपाँलाई बले-व
पैद जेलाई आदानी होदा जैचिऱ्यार।
८निताव गेसथैचिधुव चाव थाकिन
जेलाई छुत पाँ सथैऱ्यावलाई, गे तादी
ब, स्वर्गनी हुव चाकऱ्या तादी ब, जो
तादी ब, नोलाई परमेस्वरए ओसराप
ओलागिस्क। ९डादाकिनकाव
है गेदाचिऱ्याव मिताव फरी ब है
डादाचिऱ्या, जेदैव चाव थाकिन
जेलाई तँनी सथैऱ्यावलाई परमेस्वरए
ओसराप ओलागिस्क।

१०इताव डापाँए मिँरालाई सभैःन्याए
जूनी डापाँऱ्याव सै परमेस्वरए उजूनी
डापाँऱ्याव? आःपै डा मिँरास सऱ्या
पुगिन्याए जूनी डादोऱ्याव ताकिन
ख्रीसए ओयेन दान्या डामाजैसिखेहो।

पावलए ओपाँ मिँए युँ स्यानी हुव

माःक

११डा जेलाई है डादाचिऱ्या, डानै
डामेर, जेलाई डासथैचिउ चाव था
भरी मिँए युँ स्यानी हुव पाँ माःक।
१२नो पाँ मिँराए याल्योनी डादैव ब

माःक, मिँरानी डासिऊसिउ ब माःक।
येसु ख्रीसए ओल ज़ सतैद ओयाँवनी
डादैव ची।

पावलए डादाकिनकाव ओदोव येन

१३डा डादाकिन यहूदी धर्मल
डालिऱ्याकाव डादोव येन भरी जे
ब थैद जेनेऱ्याखेहो। परमेस्वरए
ओमन्दलीलाई उमिन समैदचान्याए
जूनी याखिरी पसिद क्योःए क्योःए
बनै हत्या डाराएऱ्याव। १४डासाखा
पुर्खाराए यादोहुव चलनल उपुर्काव
यहूदी डासवानीराकिन बनै उदिम
डादोवए नो धर्मल उपुर्कावराकिन
हुण्धारी ब डाताके। १५खाली डा
निताव मिँलाई ब परमेस्वरए डाल्योदा
उयुँ याल्द डामाजर्मिद ज़ ओयेन
दान्याए जूनी खतैद ओनेनाऱ्याव
ओल्यो। १६ओल ज़ डानी छुत
जातलाव मिँरालाई ओपाँ घरासथैवक
लिद ओज़ालाई डाक्याँत सतैदचान्या
युँ दोक्यो। हाःत ज़ सुस ज़ मापाँसिद,
१७डाकिन डादाडाव लिऱ्याव येसुए
ओसाचीरास दैसिना यरूसलेमदा
माबाद अरब देसदा डाबाके। छींनी
फरी दमस्कस सहरल ज़ ओल्द
डाहुके।

१८सौरिम डातावत वाज़ बल्ल
पत्रुसस सरेस्सिन्याए जूनी यरूसलेमल
बाद ओलस पन्ध्र दिन डालिके।

१६ प्रभुए छुत ओसाचीरास सुस ज़ डामादैसिए, प्रभुए ओभाइ याकूबस वाज़ गिन्दैसिके। २० डा आव जेलाई सर्द डाय़ाचिउ पाँ भरी साचो ज़ लिज़्या, धुत माःक, परमेस्वर साची लिज़्या।

२१ होकिन छीनी सिरिया सोनो किलिकिया खन्द जीदा ब डाबाके। २२ हाः बेलाक पै यहूदिया खन्दलाव ख्रीसए उमिनताव मन्दलीराए डालाई यामारँःनाताव। २३ नो परमेस्वरए ओपाँत यायुँ हुबोराए, “डादाकिन गेखिरी पसिद परमेस्वरए ओपाँ खेमो पैज़्याव पावलए आज्याल ते ओल ज़ परमेस्वरए ओपाँ यासथैज़्याव दी,” लिन्या वाज़ याथैज़्याव। २४ नो पाँर थैद डाजूनी परमेस्वरलाई धन्याबाद याचरैःज़्याव।

मन्दलीलाव घेप्पाराए पावलए ओपाँ याभैःव

२ डा बल्ल चौध बर्स छीनी डास बारनाबास सोनो तीतस-निलाई लाँद फरी यरूसलेमल डाबाके। २ नो डाबाव ओल परमेस्वरए सतैद ओयाँवनी ज़। होड बाद नो छुत जातलावरालाई डारासथैज़्याव परमेस्वरए ओपाँ

‘सिप्यानी डारासथैज़्याव सैं बिप्यानी डारासथैज़्याव?’ लिद नलाव मन्दली-लाव घेप्पाराए ल्योक अलगज़ा बाद डाय़ेन भरी सतैद डाराएके। ३ नोराए मनी डाय़ेनर भैःद डास बाव तीतसलाई छुत जातलाव^१ ओतादी ब क्यालन्या सरैस जैन्या कर मालैकेर। ४ खाली हो बेलाक नो दुप्सिद यालिज़्यावल तोबो नेब्लो ख्रीसए उमिनताव मिताव जैसिद, गेखार्ल पसिद साँना हुवर ब यालिज़्याव। नोराए गेलाई येसु ख्रीसए पलाःद ओरास्सिउनी फरी बाँदा मिताव जैव यापैज़्याव। ५ गे फरी जेस लिज़्याव ख्रीसए साचो ओपाँ बलेःज्या लिद नोराए यापाँ तोबो ब भैःद गेमाराएके।

६ परमेस्वरए ओपाँताव घेप्पा मिन दैवराए डा डारासथैव परमेस्वरए ओपाँकिन छुत काता पाँ ज़ माचाःर। तान्या ते नोर जो मिताव यातादी ब डालाई मतलब माले, परमेस्वरए मिँ रँःद मादोव। ७ बुरू नोराए, किताव पत्रुसए यहूदीरालाई परमेस्वरए ओपाँ सथैन्या हक ओदैव याथःरैव, हिताव ज़ डालाई ब छुत जातलावरालाई परमेस्वरए ओपाँ सथैन्या हक डादैव थःरैनाकेर। ८ किताव परमेस्वरए

१२:३ छुत जातलाव है लिसिउ ग्रीक खामनी — ग्रीक।

२:६ व्य १०:१७

ओल ओसक्तीनी पत्रुसलाई यहूदी-रालाई ओपाँ सथैऩ्या ओसाची ओजैव, हिताव ज़ डालाई ब ओल ओसक्तीनी छुत जातलावरालाई ओपाँ सथैऩ्या ओसाची जैनाक्यो। ६आव येनत परमेस्वरए ओअसिक डादैव यासरेसोए परमेस्वरए ओपाँताव यामिन थासोर याकूब, पत्रुस सोनो यूहन्नाराए गिनलाई बारनाबासस यास सम समकाव येनल गनिसिन्केर। है जैद गिनलाई छुत जातलावराए ल्योदा बान्या जैसिन्केर, या यहूदीराए ल्योदा बान्या थऱैकेर। १०नोराए गिनलाई तोबो पाँ वाज़ है दासिन्केर, नो यासकाव माथैव मायोऱवरालाई चिऊन्या। डा ब नो पाँत खुसी ज़ डाताके।

पावलए पत्रुसए ओयेन सुधारेद ओयो

११छीनी पत्रुस एन्तिओखियाल उलिज़्याक नोए मिँराए डाक नेयेन ओदोवए ओपाहा भाःद डाएके। १२नल पत्रुसए डादा याकूबए ओल्योडाव मिँर यामाहुवा पै छुत जातलाव मिँरास ज़यान्यार सिप ज़ उज़्युज़्याव। खाली पत्रुस क्यालन्या सरेस जैव पैज़्यावरास ओछेऱ्यावए याकूबए ओरापरींव मिँर याहुवत

नोरालाई रँःद नो छुत जातलावराकिन जाँ तँदा जैसिद नोरास ज़यान्यार ब सिप माज़्युक्यो। १३हाःकिन नो सहरलाव परमेस्वरए ओपाँत हुव यहूदीराए ब ओल मिताव ज़ नेयेन दोनाकेर। छीनी भन बारनाबास ब नोराए यायेनदा ज़ खैनाके। १४नोराए खीसए ओपाँ साचोस यामादोज़्याव डारँःवए डा प्राइँराए डाक च्याँःसिद पत्रुसलाई है डादोके, “नँ यहूदी ताद ब यहूदी चलन रास्द छुत जातलाव मिताव नजैसिके। नँ निताव जैसिउ मिँए फरी कै जैद छुत जातलावरालाई भन यहूदी जैसिउ नरापरींज़्याव?”

१५नोलाई है डादोवए ओअर्थ आव ज़ — ‘गे जर्मननी ज़ यहूदीर गेलिज़्या, छुत जातलाव मिताव पापीर गेमाले’ है गेलिदी ब, १६मोसाए ओकानुननी सु ज़ परमेस्वरए उयुँलाव तान्या माताए, येसु खीसलाई युँ हुपन्यानी वाज़ ताज़्या लिन्या गेसैंज़्या। है जैद गे परमेस्वरए ओपाँत हुव यहूदीराए मनी नो पाँ साचो ज़ गेथऱैवए गे मनी येसु खीसलाई गेयुँ गेसुहुप्के।

१७गे खीसनी धर्मी थ०रिन्या धामा दाज़्याव यहूदीरालाई मनी छुत जातलावराए माँःती पापी याथऱैसिज़्याव ताकिन, खीसए

माचाव येन ओदोव रोकी? हिताव ते माःक। १८ बुरू गे फरी नो डादाडाव मिताव मोसाए ओकानुननी धर्मी जैसिन्या गेखिम्किन भन ननी ज़ पापीर गेगनिसिज़्या। १९ डा परमेस्वरए उयुंलाव मिताव डाताक लिद, डालाई सिन्या सजाल भाःज्याव मोसाए ओकानुननी डामिन क्याल्द डापुलुस्के। २० है जैद डा ख्रीसस क्रुसत तङ्गैसिद ओलस डसिउ मिताव ज़ ताके। हैदी ब डा डामासिए, जींदो ज़ डालिज़्या। खाली नो जींदो लिज़्याव डा माःक, नो डस लिज़्याव ख्रीस ज़। अबकिन आव डाजिउ डा डाजूनी माःक, डालाई उयुं नाद उजिउ भाःदद्याज्याव परमेस्वरए ओज़ाए उजूनी डायुं हुप्द ज़ डादोज्या। २१ परमेस्वरए उयुं गरौंद, दाद ओयासिउ येनलाई अनाकलाव डामाजैए। गे मोसाए ओकानुननी परमेस्वरए ओडाक उयुंलाव मिताव गेताज्याव ताकिन गेजूनी ख्रीस उसिउ अनाकलाव ज़ ताखेहो।

युं हुप्न्या सोनो मोसाए ओकानुन

३ ए काता ज़ मातीधुज्याव गलातीर, जे डादा परमेस्वरए ओपाँ जेथैक येसु ख्रीस चबनै

जेडाक क्रुसत उसिउ मिताव ब जेरँके। आज्याल कै जेताव इताव, काताए ओमोहोनए नै ओजैचिज्याव? २ जे डालाई तोबो पाँ है दाँचिके, जे मोसाए ओकानुनलाव येन जेदोवनी छैँव पुरूस जेदैव सैं परमेस्वरए ओपाँ थैद जेयुं जेसुहुबोनी जेदैव? ३ जे कै जैद इताव आः मातीधुन्यार जेताव? छैँव पुरूसनी जेयुंल साःरो थालिद जेनैज्यावलाई कै जैद जेसक्तीनी सयोःव जेपैँज्याव? ४ नो आक पैकाव जेक्याँताव जेसहिउ भरी अनाकलाव ओतारिज्याव सैं साचो ज़ उथःरिरिज्याव? ५ जेलाई ओल उपुरूस जोरैदद्याद जेखाल अचम्बलाव येनर दोदद्याज्याव परमेस्वरए जेलाई मोसाए ओकानुन जेदोज्याव रँःद ओदोज्याव सैं ओल ओपाँ थैद जेयुं जेसुहुबोनी ओदोज्याव? ६ धर्मसास्त्रल ब गेपुर्खा अब्राहामए उजूनी अइ लिद सर्सिउ लिज़्या,

“परमेस्वरलाई उयुं उसुहुबोनी ज़ परमेस्वरए नोलाई धर्मी थःरैक्यो।”

७ ननी ज़ रँःज्या, जो जोराए परमेस्वर- लाई यायुं हुप्ज्या, हो होर वाज़ साचो अब्राहामए ओथोर ताज़्यार।



८धर्मसास्त्रल परमेस्वरए ङादा ज़,
‘छुत जातलावर ब यायुँ यासुहुबोनी
ज़ डायुँलाव मितावर तारिज़्यार’
लिन्या सैंद अब्राहामलाई अइ लिद
सतैदिक्यो,

“नँ नयेमनी ज़ प्राईं जातलाव
मिँराए परमेस्वरए ओअसिक
दैरिज़्यार।”

९है जैद किताव अब्राहामए उयुँ
उसुहुबोनी असिक ओदैव, हिताव
ज़ यायुँ सुहुपुज़्याव भरिए आज्याल
ब परमेस्वरए ओअसिक दैज़्यार।
१०कानुननिकाव येमनी परमेस्वरए
ल्योदा बाव पैंज़्यावर ते भन सजा
दैरिज़्यार। काराव ल्यो ताकिन
धर्मसास्त्रल इताव सर्सिउ लिज़्या,

“कानुनलाव सर्सिउ येन भरी
मासयो·धुज़्याव मिँ
सजाल परिरिज़्या।”

११परमेस्वरए ओङाक कानुनलाव
येननी सु ज़ परमेस्वरए उयुँलाव
मिताव माताधुर। काराव ल्यो ताकिन
धर्मसास्त्रलाव सर्सिउ मितावनी ज़,

“उयुँ हुपुद परमेस्वरस खैव मिँ
वाज़ बाँचिज़्या।”

१२कानुनलाव येम ते युँ हुपुन्यानिकाव
येम मिताव माःक। धर्मसास्त्रल ब,

“कानुनलाव येन माबिरैद
दोज़्याव मिँ वाज़ बाँचिज़्या।”
१३गे गेमासयो·धुज़्याव कानुननिकाव
दैव परिन्या सजाल ओल खीस थाँसिद
क़ुसत तङ्गैसिद गेसजा भरी घुर्द नो
सजानी पले·सिक्यो। धर्मसास्त्रलाव
सर्सिउ मिताव ज़,

“क़ुसत तङ्गैसिद सिज़्याव भरी
परमेस्वरए ओसजा दैवर ज़।”

१४परमेस्वरए अब्राहामलाई ओयो
असिक छुत जातलाव मिँराए मनी येसु
खीसए ओक्याँनी ज़ दैज़्यार। ननी ज़
फरी गे ओललाई गेयुँ हुपुज़्याव भरिए
परमेस्वरए है दाद ओनैसिज़्याव छैव
उपुरुस ब गेदैज़्या।

कानुननी माःक, य़ाकानी ची

१५अ डानै डामेर, जेलाई गे मिँराए
गेचलननी परमेस्वरए ओपाँ तोबो
पलास्द ड़ायाचिरिज़्या। नेब्लो मिँनी
निखाल् तोबो बाचा नैद, सर्द निसही
छाप भाःद निनैकिन नत सुए ज़
माचा·धुर, माघतैधुर। १६हो मिताव
ज़ परमेस्वरए अब्राहामलाई ओथोस
य़ाका तोबो याद उनिनैज़्याव।
धर्मसास्त्रलाव नो य़ाका अब्राहामए
ओथो भरिरास माःक, तोबोए



ओक्याँत वाज़ योःके — नो ख्रीस ज़। १७नो है डादाचिज़्यावए ओअर्थ आव ज़, नो परमेस्वरए अब्राहामस ओनैव बाचाकिन चार सय तीस बर्स छीनी हुव मोसाए ओकानुननी ब नो डादा ओएधुव याकालाई माख्याव। १८परमेस्वरए नो असिक भरी अब्राहामलाई कानुननी ओयो माःक, याकानी ओयो ची। काराव ल्यो ताकिन नो असिक परमेस्वरए छीनी कानुननी दैन्या ओजैव ताकिन अब्राहामलाई ओएधुव याका अनाक-लाव ज़ तान्या ओल्यो।

१९जे फरी, “हिताव ताकिन ते परमेस्वरए मोसालाई नो कानुन काराव ओयो?” है जेलिज़्याखेहो। परमेस्वरए नो कानुन मिँराए यापाप सतैदचान्याए जूनी अब्राहामए ओथोलाव ख्रीस ओमाहुवा पै वाज़ ओयो। नो कानुन परमेस्वरए ओचाकज्याराए ल्योनी थालिद मोसाए उकुइनी मिँरालाई याएक्यो। २०परमेस्वरए अब्राहामलाई ओयो याका ते त्यालाए ल्योनी माःक, एकसब्दचा ज़ ओल परमेस्वरए ल्योनी ज़ हुके।

२१हैदी ब मोसाए ओकानुन परमेस्वरए अब्राहामलाई ओयो

याकाकिन तँदा माले। नो कानुनए मिँरालाई परमेस्वरस सखैद साःरो युँ जैद ओरायो ताकिन मिँर नो कानुननी परमेस्वरए उयुँलाव मिताव ताखेरहो। २२खाली कानुनए ओयेन ते मिँरालाई पापए उधुँल क्योःद ओरानैज़्याव मिताव सरैःन्या लिज़्या। नो पापल क्योःसिद लिज़्यावरानी जो जोराए येसु ख्रीसलाई यायुँ सुहुप्यार, हो होराए ज़ परमेस्वरए अब्राहामलाई ओयो याकालाव असिक दैज़्यार।

२३हैदी मनी परमेस्वरए ख्रीसनिकाव युँ हुप्य्या येम ओमासतैवा पै कानुनए गेलाई घिरिद ओनैसिज़्याव मिताव गेल्यो। २४है जैद ख्रीसलाई युँ हुप्य्द परमेस्वरए उयुँलाव मिताव तान्यादा लाँन्याए जूनी कानुनए गेलाई ख्रीसए ल्योक ओसारैसिउ मिताव ज़ ताके। २५है जैद युँ हुप्य्द परमेस्वरए उयुँलाव मिताव गेतावए हाःकिन गे नो कानुनए उधुँल गेमाले।

युँ हुप्य्यानी परमेस्वरए ओज़ार गेताज़्या

२६है जैद जे प्राइँ येसु ख्रीसलाई जेयुँ उहुबोए परमेस्वरए ओज़ार ज़ जेताके। २७जे ख्रीसए उमिनत सछैँसिउर परमेस्वरए ओडाक ओल ख्रीस

मितावर ज़ जेताके। २८हाःकिन जे यहूदी मायहूदी है लिन्या ओमेला ब माले, बाँदा माबाँदा है लिन्या ब माले, खेपा मेंमा है लिन्या ब माले, प्राइँ ज़ येसु ख्रीसनी तोबो ज़ जेताके। २९ख्रीसए उमींर जेतावए जे ब अब्राहामए ओथोलाव याकालाव असिक दैवर ब जेताके।

✂ १-२फरी मिंराए गेचलननी तोबो मिसाल भाःद डायचिरिज़्या। तोबो छोऱ्या ओमाछिपद ज़ ओबाबु उसिकिन नोए ओबताहा ओल ओमाछिपा पै छुतए धानिदिज़्याव। नो बताहा छोऱ्याए उमीं ओतादी ब नो धानिदिज़्यावए उधूँल लिद ओबाबुए ओयेन दाज़्यावरास तोबो मिताव ज़ ताज़्या। ३हिताव ज़ गे ब ड़ादा मानुवाताव चाल चलनराए धूँल माछिप्तावर गेल्यो। ४खाली बेला ओयोःवत परमेस्वरए ओज़ालाई परीक्यो। तोबो मेंमानी कानुनए उधूँल जर्मिद, ५गे परमेस्वरए ओबताहा दैव ओज़ार तान्याए जूनी कानुनए उधूँल लिज़्यावरालाई गेएः फोःदचाद रास्सिक्यो। ६गे परमेस्वरए ओज़ार गेतावए ओज़ाए उपुरूस गेयुँल भाःदचाद, नो पुरूसए ज़

परमेस्वरलाई 'अब्बा, बाबु' है ल्यो ब परीसिज़्याव। ७हाःकिन गे बाँदाल मागनिसिद, ओज़ार गेगनिसिके। ओज़ार गेतावए ओबताहा दैन्यार ब गेताके।

पावलए उयुँ थू ओताव

८खाली जे ड़ादा परमेस्वरलाई मासरेस्द देवताराए याबाँदा जेल्यो। नोर ते परमेस्वर माःक। ९आज्याल ते परमेस्वरलाई जेसरेस्ज़्या, परमेस्वरए जेलाई ब सरेस्चिज़्याव। है जैद जे निताव ताव मिंर कै जैद जेछींदा ओल्द माथोरिउ ओर्सा माल्यो थालनलाव पाँदा ज़ बाव जेपैँज़्याव? नितावए ते फरी ब बाँदा ज़ जैसिउ जेपैँके। १०जे नो कानुननिकाव अनाकलाव पर्बर, बारर, मैनार सोनो बर्सर ब जेमनिज़्या दी। ११जेक्याँताव डादोव येन ते अनाकलाव ज़ ताए सैँ लिद डायुँ थू ताज़्या।

कै जैद जेयुँ डाल्योनी तँदा ओबाव?

१२अ डानें डामेंर, जेस डापाँ तोबो लिज़्या। डा कानुन धूँनी हाइसिद जे मिताव मायहूदी डाजैसिके, जे मनी डा मिताव जैसिचिके।†

†४ः१२ पावलए यहूदीराए याकानुन याचाल चलनर रास्द छुत जातलावराए मिताव जैसिके। ननी ज़ गलातीर मनी यहूदीराए याकानुन याचाल चलनराए धूँल ल्यो ओमापरिज़्याव रैँऱ्या।

जे डालाई माचाव काता ज़ जेमाजैनाए। १३जे ज़ जेसैज्या, जेल्योड डाजोरो हुद डाथलिउए डाल्योनी परमेस्वरए ओपाँ थैव जेदैके। १४हाः बेलाक डाबेथा बनै माचाव ओतावए जेलाई दुख ताद ओल्यो। हितावत ब जेर्युँ जाम्द जेसुम्नाके। भन डालाई परमेस्वरए ओचाकज्या मिताव रँःद येसु ख्रीस उहुव मिताव जेजैनाके। १५हाः बेलाकाव निताव डाल्योदा ल्यो जेमया आज्याल कै ओताव? डा जेसाची डालिज्या, हो बेलाक ते जेधुकिन जेमी कोलाःद डालाई यान्याकावर ब जेल्यो। १६आज्याल फरी साचो पाँ सतैद डायाचिउए जेसुतुर मिताव जेजैनाव रो?

१७नो जेल्योडाव तँनी पैज्यावराए जेलाई याल्योदा जैन्याए जूँनी बनै उदिम दोज्यार। नो यादोज्याव चावनी माःक, जेलाई डाल्योनी फातैद लाँव यापैज्याव वाज़ ची। १८चाव येनत उदिम यादोज्याव ताकिन ते चाव ज़, खाली डा जेल्योड डालिक वाज़ माःक, एकमन्या निताव ओताक। १९अ ज़िमज़ा डाज़ार, जे ख्रीसए ओगे चावस जेमारेवा पै किताव ज़ा दैन्या

मेंमा ओघर्लिज्याव, डा ब हिताव दुखल ज़ डालिज्या। २०डा जेस जाँवा पै सिप ल्यो डादैकिन ताखेहो है डालिज्या। हो ताकिन इताव नासो पाँर जेलाई है दाव ब मापरिखेहो। खाली डा आः तादानी जेस कै जैद पाँन्या, डामासैए।

बाँदानीकावर सोनो फुर्सुलनिकावर

२१जे मोसाए ओकानुन धूँल ल्यो पैज्यावराए आव धर्मसास्त्रलाव पाँ जेमाथैए रो? २२नल सर्सिउ लिज्या, अब्राहामए ओज़ानी नेब्लो निल्यो, तोबो बाँदानी बातनिकाव, तोबो फुर्सुल बातनिकाव। २३नो बाँदानी बातनिकाव मिँए ओपैज्यावनी ज़ जर्मिके, फुर्सुल बातनिकाव फरी परमेस्वरए ओयो याकानी ज़ जर्मिके। २४नो मेंमानी निक्याँत नेब्लो बाचा रँःज्या। नो बाँदानी हागार सीनै खागरताव बाचाँ स्यासो लिज्या। नल लिज्यावर हागार बातनिकाव बाँदा मितावर लिज्यार। २५आज्यालकाव यहूदी धर्मलाव मिँर ब नो कानुन धूँल यालिज्यावए अरब देसलाव सीनै खागरत हागारस यालिज्याव

१४:२४ सीनै खागरताव बाचा है लिसिउए ओअर्थ मोसाए ओदैव कानुन ज़। प्रस १६:२; २०:१-१७ चिऊन्या।

४:२२ उत १६:१५; २१:२

स्यासो ज़ लिज़्या। २६गे स्वर्गताव यरूसलेमलाव मिर्रं[†] ते अब्राहामए ओज्या स्यासो फुर्सुल बातनिकावर गेलिज़्या। २७ धर्मसास्त्रल ब इताव सर्सिउ लिज़्या,

“अ ज़ा मादैन्या थारी मेंमा,
नयुं होलां जैके।
ज़ा दैन्या नक्यांत मापरिउ,
नरेंतए सास्निके।

काराव ल्यो ताकिन ओरेस
लिज़्याव मेंमाए ओज़ाराकिन,
नरे माल्योए नज़ार
कुधु तान्या लेर।”

२८ डानै डामेर, जे इसहाक स्यासो परमेस्वरए ओय़ाकानिकाव ओज़ार जेताके। २९ किताव ड़ादा मिँए ओपै-ज़्याव मितावनी जर्मिउ इस्माएलए परमेस्वरए उपुरुसनी जर्मिउ इसहाक-लाई ओसोज़्याव, आज्याल ब हिताव ज़ लिज़्या। ३० है जैद धर्मसास्त्रल अइ लिद सर्सिउ लिज़्या,

“नो बाँदानीलाई ओज़ास
निखेपैके।

नोए बताहा मादैव।
फुर्सुल बातनिकावए वाज़
दैरिज़्याव।”

३१ है जैद डानै डामेर, गे ब बाँदानी-कावए ओज़ार माःक, फुर्सुलनिकावए ओज़ार गेलिज़्या।

५ ख्रीसए गेलाई फुर्सुल तावर जैन्याए जूनी कानुनए उधूनी पले-सिक्यो। है जैद जे फुर्सुल ताद जेलिज़्यावल थंरिद ल्यो ताके। फरी ब बाँदा मिताव जैसिन्या माःक।

ख्रीसकिन तँदा ताबाच्यो

२डा पावल जेलाई है डादाचिज़्या, क्यालन्या सरेस जेजैसिकिन, जेजूनी ख्रीसए ओयेन ज़ माले। ३फरी ब प्राइंलाई है डादाचिज़्या, जोए क्यालन्या सरेस ओजैसिकिन नो मिँलाई मोसाए ओकानुन भरी सयो-न्या कर लिज़्या। ४कानुननी परमेस्वरए उयुंलाव मिताव जैसिन्या ताकिन नो मिँ ख्रीसनी हाइसिद परमेस्वरए ओदयानी ब पुलुस्ज़्या। ५गे ते ख्रीसलाई गेयुं हुपुद छैव पुरुस गेदैवनी परमेस्वरए ओड़ाक उयुंलाव मिताव थंरिन्या गेकींज़्या। ६है जैद क्यालन्या सरेस जैसिउ तादी ब, माजैसिउ तादी ब, येसु ख्रीसनी ओलेखा ज़ माले। बुरू युं थू जैद युं सुहुप्या वाज़ लिज़्या।

†४:२६ स्वर्गताव यरूसलेमलाव मिर्र है लिसिउए ओअर्थ साःरो बाचालावर, अथबा, येसु ख्रीसए उछींत बाज़्यावर ज़।

४:२७ यसै ५४:१ ४:२९ उत २१:९ ४:३० उत २१:१०

७जे डादा निताव येमल थिकस जेबाऱ्याव, नो साचो येमनी सुए ओवेंचिउ? ८निताव तँदाडाव येम बान्या, जेलाई ओल्योदा खुलो परमेस्वरए ओभाःचिउ ते माःक। ९नो एकतारकाव गेभाःऱ्याव आहातीनी सेंच्यो, “मुछिसिउ कनेल तकेऱा सोगोइन्या वासः भाःकिन कने भरी सरालिऱ्याव।” १०आव है डादाचिउ भरी जेभैःया ज़ लिद प्रभुए ल्योदा डायुँ हुबो ज़ लिऱ्या। जोए जेलाई गरबर जैचिऱ्याव, होए ओयेन भरी ओडैत ज़ हरिऱ्या।

११आव ब सेंच्यो, डानें डामेर, नोराए डालाई है यादाँऱ्याव मिताव, क्यालन्या सरेस माजैसिद माताए लिद यास खैव पाँ डारासथैऱ्याव ताकिन नोर डाखिरी कातानी यापसिरिऱ्याव, मापसिखेरहो। खाली येसु ख्रीसए क्रुसत उजिउ भाःद ओयासिउनी परमेस्वरस गेखैऱ्या है डारादोऱ्यावनी यायुँ कोला कोला ताद डाखिरी पसिऱ्यार। १२जेलाई निताव क्यालन्या सरेस जैसिउ परीऱ्यावर बुरू याज़ याक्याँलाई ओजरानी याक्याल्दी ब तान्या ले।

१३अ डानें डामेर, जेलाई परमेस्वरए सुए उधूँल ब मानैद फुर्सुल तावर

जैन्याए जूनी उखुल्चिउ ची। खाली नो फुर्सुल ताद जेमन लागिउदा बान्या माःक, बुरू छुतए ल्योदा युँ थू जैद समारिसिउ ताके। १४मोसाए ओकानुनलाव पाँ भरी तोबो पाँत थोम्सिऱ्या। नो पाँ आव ज़, “जेक्याँलाई किताव जेसमारिऱ्या, छुतलाई ब हिताव ज़ समारिउ ताके।” १५जे इंसिद हुनी होदा कैसिवा कैसिवा जेजैसिकिन परमेस्वरसकाव जेसज्यो फ्याःन्या ओछ्यास लिऱ्या।

छैंव पुरूसनी कानुन भरी युँ स्यानी ज़ योऱ्या

१६है जैद डा है डादाचिऱ्या, जे छैंव पुरूसनी जेदोकिन मिँनिकाव माछैंव युँ स्यानी दान्या जेमाले। १७मिँनिकाव माछैंव युँ सोनो छैंव पुरूसनिकाव युँ छुत छुत ज़ ताऱ्यानी। नोनी निमाखैवए कैताक दोव जेपेंऱ्याव येन ब जेमादोधुइ। १८खाली छैंव पुरूसनिकाव युँनी जेदोकिन जे कानुनए उधूँल जेमाले। १९फरी मिँए माछैंव उयुँनी इताव हुऱ्या — पातज्या पातर्नी जैसिन्या, युँ माजामो येन दान्या, जोत ब युँ मानैधुन्या, २०अडग्या पुजा दान्या, मन्तर तन्तर दान्या, माखैव तान्या, इंसिन्या,

मी तून्या, रिस चोन्या, क्याँलाई तान्या वाज़ खिम्न्या, फातैन्या, अर्काए उउपर्त तँदा जैसिन्या, २१लोभ दान्या, मँःए मँःए रलामातल बारिन्या, नो स्यासो छुत माचाव येनर ब हुज़्या। डादाकिन है दाद डाम्जैचिज़्याव मिताव फरी ब है डादाचिज़्या, निताव येन दाज़्याव भरी परमेस्वरए ओराज्याल पसिधुन्या मालेर।

२२फरी परमेस्वरए उपरूस ल्यो मिँए उयुँनी ते इताव येनर हुज़्या — प्राइँए ल्योदा युँ थू जैन्या, रेंद लिन्या, युँ होलाँ तान्या, सहिधुन्या, युँ नान्या, युँ याल्न्या, सतस लिन्या, २३प्राइँत मुइलिउ तान्या सोनो थंरिउ युँ जैन्या। आव येन भरी जो कानुननी तादी ब तँदा माले। २४येसु ख्रीसए उमीर ते डादाडाव माछैँव यार्युँलाई मादान्या यादोव यायेनरास ज़ क्रुसत तङ्गैद याख्यानैव मिताव ज़ लिज़्या। २५गे छैँव पुरूसनिकावर गेतावए, दान्या भरी छैँव पुरूसनी ज़ दाव ताके। २६गेखाल सघ्योःसिन्या, भेंःस्या जैसिन्या, छुत-लाई सोन्या सु ज़ ताताक।

अर्काए ओगलती वाज़ रँःन्या माःक

६ अ डानैँ डामेर, जेनी सुवाराए मादान्या येन ओदोज़्याव जेरँःकिन, जे परमेस्वरए ओपाँताव थंरिउराए नो मिँलाई चावस सुधारैव

ताके। खाली नोलाई जेसुधारैक कसाराक नो उपरिउल गे ब गेपरिया लिद जे जेक्याँलाई ब जोगोइव ताके। २जेस सुवार दुखराल परिन्या मितावर जेरारँःकिन, जे जे समारिसिउ ताके। ख्रीसए ओकानुन ननी ज़ योःज़्या। ३जोए, “प्राइँ डा ज़ डासैँज़्या, डालाई सुए ज़ है दाव मापरिए” लिद ओसघ्योःसिकिन निताव मिँ ओलनी ज़ भुकिके। ४जे ब जेयेन अर्काए ओगलतीस गोइँन्या माःक। बुरू जेयुँलाव जेयेन जे ज़ थरैव ताके। हुनी वाज़ ‘डायेन आःकाव उलिज़्याव ओल्यो’ लिन्या सैन्या जेले। ५परमेस्वरए ओडाक ब सु सु यायेन सु सु यागोइँ ज़ लिज़्या।

६परमेस्वरए ओपाँ सिऊसिज़्याव मिँए सिऊज़्यावलाई ओसघैवक।

जो गेरूपिज़्या हो ज़ सिम्न्या गेले

७जे ताभुकिच्यो। जो येननी तादी ब परमेस्वरलाई सुए ज़ माछकैसिधुइ। गे जो गेरूपिज़्या, हो ज़ सिम्न्या गेले। ८जोए माछैँव उयुँनी हुव वाज़ दोज़्याव, नोए हो येननी ज़ फ्याःन्या मान्यालाव सजा दैरिज़्याव। फरी जोए छैँव पुरूसनी हुव येन दोज़्याव, होए नो उपरूसनी ज़ अजम्बरी जुनी दैरिज़्याव। ९चाव येन दान्यात जेचर्या तासैँःच्यो। जेचर्या मासैँःद दाव येन ज़

जेदोकिन गोइंसिउ बेलाक ओसै दैन्या जेले। १० छुतराए जूनी चाव येन दान्या मौका गेदैक नो मौका ज़ छुपिउ ताके। निताव येन दान्या फरी जाँकोसै परमेस्वरए ल्योदा यायुँ हुबो गेनेँ गेमेँराए ल्योदा दाव परिके।

सा:रो तान्याए ओलेखा

११ आकिन मेदाडाव भरी डा डाकुइए डासरो ज़। घेप्पा घेप्पा डाहरपनी ज़ सरेस्न्या जेले। १२ जेलाई क्याल्न्या सरेस जैसिउ परींज्याव-राए यहूदीराए डाक अइज्ज चाव सरै:सिन्याए जूनी वाज्ज दोज्यार। नोर ख्रीसए क्रुसत उजिउ भा:द ओयासिउ है लिन्या पाँत यहूदीर गेखिरी पसिज्या लिद छे:ज्यार। १३ नो क्याल्न्या सरेस पैज्यावर या ते भन मोसाए ओकानुन ब मादोर। अइज्ज जेलाई क्याल्न्या सरेस जैसिउ परींद यहूदीराए डाक सघ्यो:सिउ पैज्यार। १४ खाली डा ते गेप्रभु येसु ख्रीसए

क्रुसत उजिउ भा:द ओयासिउ पाँकिन छुत पाँ डासघ्यो:ज्याव तारै:क है डालिज्या। नो क्रुसताव दाद ओयासिउ येननी आव मानुवाताव पाँ भरी डा डाक्याँत उसिउ मिताव ज़ ताके, डा ब आव मानुवाताव पाँनी डालिधुव मिताव ज़ ताके। १५ है जैद परमेस्वरए ओडाक क्याल्न्या सरेस जैसिउ माजैसिउए ओलेखा माले, सा:रो तान्याए ओलेखा वाज्ज लिज्या। १६ निताव सा:रो येमनी बाज्यावर साचो इस्राएलीर, परमेस्वरए ओथोर ज़ ताज्यार। नोरालाई परमेस्वरए उयुँ ओगराँक, यायुँ ब होलाँ जैद ओरायोक।

१७ अबकिन जे सुए ज़ डार्च्या सै:द तायॉच्यो। निताव क्यॉताव सरेसनी पाँन्या ताकिन ते येसुए ओयेनताव डादैव दुखरानी डाक्याँ भरित पात्यार ज़ लिज्यार।

१८ अ डानै डामेँर, गेप्रभु येसु ख्रीसए गराँव उयुँ जेस ओताक। आमेन।